



Fasnacht 2020

Mir sin dekontaminiert

Als Waggis isch es aini vo de greeschte Plaage
E Understand z finde fir di Waggis-Waage
Wo no derfsch dini Idee baue
Ohni Ruggsicht, uf d Neegel haue
Gstalte, wärggle, sääge, moole
Di Sujet usspiele, ganz unverhoole

Z Arlese sin mier usegflooge
Und das in hoochem Booge
E neii Induschtrie macht sich deerte breit
Es wärde d Projäggt fir d Zuekunft gleit
Dr Wäber maint es sig dr Kreis im Quadratur
Dä het ebbe kai Ahnig vo Kultur

Mer sueche und wärbe um de Patrons ihri Ginscht
Aber do hesch kai Platz, dert bisch nid erwünscht
Offe kasch di Kaare niene aanestelle
Do ruggsch garantiert eim uf d Pelle
Muesch au nid uf d Verwaltig oder d Beheerde
Die saage grundsätzlich „nai“ ohni z erreete

Moole kennte d Fasnächtler inere Mässhalle
Wird jo nimme bruucht und ghert ys alle
Worum nid s ganze Joor?, dien mer huuche
Mer sin nonig tot, maint d Mäss, mer bruuche
Au s nägscht Joor no lääri Halle
Lägg, goht ys das uf d Galle!

Jetzt sin mer in Zwinge inere Halle us Holz
Mer hans gschafft, mer platze fascht vor Stolz
Doch denn duets is dr Deggel lüpfle
Quäcksilber losst ys d Naase rümpfle
Kontaminiert!, duet ys dr Verwalter saage
„Uuse!“ und rutschet uns dr Buggel aabe

Grossi Wohnige do, Grienfleechi deert
E Velowäg, wie sichs gheert
Me baut ind Heechi wies nur goht
Es herrscht jo akutti Wohnignoot
Drum muess me jedi Halle aberisse
Damit Hochhüuser kenne sprisse

Die Lingge schreie „Verdicht baue!“
Und uf f Kultur wird ghaue
Ufs UNESCO-Wältkultur-Erbe z verwyysse wär vermässe
Well Kultur kasch z Basel ganz vergässe
Sie sueche scho dr Museumsdiräggter
Er liggt näbem Basler Dybli und em alte Projäggtter

Kurz: z Basel findsch nyt meh fir d Fasnacht
Nid zem Kauf, zer Mieti oder zer Pacht
Au s Comité macht nyt und steggt dr Kopf in Sand
Sie steehn am Cortège numme deerte im scheene Gwand
Au alli Politiker kasch vergässe
Die kenne nur Ciippli sirpflle and Canapé frässe

Mer sin jetzt ab uf s Alsace zume Büür,
Wo no verstoht was isch Kültür!